

秋田狗係日本品種个狗仔，同台灣土狗身形當像，這隻狗仔係吾歸屋下人轉去台北阿伯、阿叔屋下个時節，阿叔送分个，盡記得該日吾爸對台北駛車仔上高速公路，行到中壢个時節，狗仔就開始翻(pon✓)，吾姆講狗仔怕係暈車地，吩咐吾爸等下有交流道就煞煞下去，下到交流道就同狗仔牽下車，分佢透一下萋萋个空氣，吾姆喊吾爸遽遽去買昏車藥，阿姆同阿姐七手八腳膠狗仔翻過个車肚拚掃淨利，拿面帕準桌布，掙淨來。

狗仔同个兜無熟事，故所个愛掌等狗仔，个緊掌厥頭那膠背囊，看佢艱苦到慫慫，也怕無體力走忒，等吾爸買暈車藥轉來，還買一坵 pang\，膠藥仔包到 pang\肚項，拐狗仔食，狗仔怕艱苦毋肯食，吾爸就耐心拐佢食落去，奈成點鐘過後正上高速公路轉台中，好得阿姆恁精，想著這隻辦法，一直駛車到屋，狗仔就無再過翻。

轉到屋，大家參詳愛膠佢安麼个名，安歸暗晡就無結果，阿姆又講就本本照阿叔安个名好了，狗仔來到生份人个屋下，會毋慣又同佢改名已衰過，平時喊佢嘟嘟，係愛正式紹介佢就用厥品種做姓，安到秋田嘟嘟。

嘟嘟當乖，毋會 lam\糝吠，个兜畜佢成隻月，隔壁鄰舍就毋知吾屋下有畜狗仔，狗仔盡有人情，吾屋下人逐儕轉屋，佢就會搖尾做嬌，个當中意狗仔，書包仔放到地泥下，就同嘟嘟共下搞，一半擺搞到毋記得，阿姐就會喊个入去廳下寫作業。

等到嘟嘟在吾屋下戴慣了，也膠个兜較熟事个時節，吾爸正敢渡佢出去奈，吾爸該央時有參加野球隊，就渡狗仔同屋下人共下去擲球仔，還有擲飛盤，嘟嘟當精佢比吾姐還較會接飛盤，也當會拈球仔，無想著嘟嘟體力恁好，搞到當暢。另外一片，有一陣高中生在該練球仔，一粒球仔好恬恬飛一路過來，直直擲著嘟嘟，个兜嚇到歸身冷汗，無想著嘟嘟一躍就膠球仔用嘴接等，又遽遽走等去，還擲球仔个細阿哥仔，原來吾屋下有一隻恁慶个狗仔，無渡佢出來奈，還毋知佢恁有才調，轉到屋下定著愛賞佢一餐澎湃正好。

2018.6.13 在台中 55 路公車頂